



Inatsisartuni ilaasortaq Akitsinnguaq Olsen, Siumut

§ 37-imi naapertorlugu Naalakkersuisunut apeqqummut nr. 2012-084 kisermaassilluni akuersissutinut ILO-mi isumaqatigiissummut nr. 169-mut naapertunnersut akissuteqaat.

4. april 2012
Sagsnr. 2012 060499
Dok. Nr.

Asasara Akitsinnguaq Olsen

Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: isiin@nanoq.gl
www.nanoq.gl

Inatsisartut suleriaasianni § 37 naapertorlugu imaattunik Naalakkersuisunut apeqquteqarsimavutit:

“Naalakkersuisut isumaqarpat nunatsinni kisermaassilluni ingerlatsisinnaatitaanermut akuersissutit ILO-p isumaqatigiisutaanut nr. 169-imut ima aalajangersakkanik imaqartumut naapertuuttumik suliarineqarlutillu tunniunneqartartut:

Artikel 13, imm. 1:

Kapitalimi uani aalajangersakkanik atuinermut atatillugu naalakkersuisut inuit nunami immikkoortunut aamma/imaluunniit nunap ilaanut namminneq oqartussaaffigisaannut imaluunniit allatut atugaannut atatillugu kulturii anersaakkullu immikkut pingaartitaat ataqqissavaat, ingammik pissutsini taakkunani ataatsimoorussat.

Artikel 14, imm. 1:

Inuit pineqartut nuna qangaaniilli atukkaminut piginnittussaanissaat ataqqineqassaaq. Tamatumalu saniatigut naapertuuffiatigut inuit pineqartut, kisimiillutik nunamik piginnittuutinnagit, taamaattorli qangarsuaaniilli inuussutissanik pissarsiffigisarsimasaannik, ileqqutoqqanillu atuiffigisarsimasaannik, nunamik atuisinnaanerat qulakkeerniarlugu suliniuteqarnissaq aalajangersarneqassaaq.

Artikel 15, imm. 1:

Inuit pineqartut nunaannut tunngatillugu pisuussutinut oqartussaaffeqarnissaat qulakkeerneqassaaq. Pisinnaatitaaffinnut taakkununga inuit taakku pisuussutinut taakkununga atuinermut, aqutsinermut kiisalu paaqqutarinninnermut peqataanissamut pisussaatitaaffeqarnerat atuuppoq.”

Apeqqutigisat imatut paasivara, matumani pineqartut aatsitassanik misissueqqissaanermut iluaqutiginninnermullu kisermaassilluni akuersissutit Naalakkersuisunit aatsitassanut ikummatissanullu inatsit naapertorlugu nalunaarutigineqartut.

Danskít naalakkersuisuisa ILO-p isumaqatigiissutaani 169-imit akuersissutiginninnermut atatillugu nalunaarutikkut oqaatigaat, Danmarkimi nunap inoqqaavinik ataasiinnarnik peqartuq, tassalu Inuit – Kalaallit Nunaanni nunap inoqqaavi. Nalunaarummi nassuiaatigineqarpoq Kalaallit Nunaanni inatsisitigut inissisimaneq, tassunga ilanngullugu pisortat nunamut piginnittussaataasut. Taamaasilluni nalunaarutigineqarpoq, inatsisitigut inissisimaneq oqaatigineqartuq, tamatumalu kingornatigut Namminersomerullutik Oqartussat (maannakkut Namminersorlutik Oqartussat) tamakkiisumik nunamut aalajangiisinnaassuseqartut tassanilu artikel 14-ip tunuatungaaniittut mianerineqartussat eqquutsinneqarlutik, tassalu nunap inoqqaavisa sumiiffinnut qangaaniilli pigisaminnut aalajangiisinnaassuseqarnerat, ataqqineqassasoq. Tamanna akuersissutigineqarpoq 2001-imi ILO-mi aalajangiinikkut Uummannatoqqami (Thule-mi) innuttaasut isumaqatigiissutip isumaa naapertorlugu immikkut nunap inoqqaavisut isigineqassanersut pillugit. ILO isumaqarpoq, Uummannatoqqami innuttaasut inuttut allaanerusutut kalaallinilu allanit immikkoortitaasutut isigineqarnissaannut toqqammavissaqanngitsoq. Ilanngullugu ILO-mit isigineqarpoq nuna qangaaniilli Inunnit najugaqarfigineqartarsimasoq, sumiissusersillugu paasineqarsimasoq Kalaallit Nunaata tamarmiusup nunataatut. Taamaattumik ILO isumaqarpoq Kalaallit Nunaanni innuttaasunik immikkut nassuiarneqarsinnaasutut inunnut pingaanginnerusunut agguataarineq, ILO-mi isumaqatigiissutip ataani immikkut piginnaatitaaffeqartussatut, ataatsimoortumik ileqqutoqqanik tunngaveqartumik nunamut piginnittussaataaannermut naapertuutissanngitsoq uppersarneqarsimasorlu Kalaallit Nunaanni oqartussaasut tungaannit piviusumik oqartussaassuseqarfigineqarnerisigut.

Namminersorluni oqartussaaneq eqqunneqarnerani aamma nunap ataaniittunik iluaquteqarsinnaatitaaneq oqaasissaqarfigilerneralu kingunerivaa ILO-p isumaqatigiissutaani 169-imi ininngasatut pisussaanerillu pineqartut illersorneqartussat isumagineqassasut.

Ulloq 21. juni 2009-imi namminersornerup eqqunneqarneratigut Kalaallit Nunaannut aatsitassarsiornerup tungaatigut ingerlatsinissanut nalinginnaasunik killiliussanik aalajangersaasinnaanernut tunniunneqartunut isumagisassanngortinneqarput aamma ilaatigut nunap nunataviani aatsitassanik ikummatissanillu misissueqqaarnernut, misissueqqissaarnernut aamma iluaqutiginninnissanut akuersissutitut aningaasaliissutitullu isikkulinnut aqutsisinnaaneq.

Aatsitassat pillugit ingerlatallu tamatumunnga pingaarutillit pillugit inatsisartut inatsisaata nr. 7, 7. december 2009-meersup atortuulersinneqarneratigut aatsitassanut ikummatissanullu inatsit naapertorlugu aatsitassarsiornerup tungaatigut inatsisiliorneq oqartussaasutullu pissaaneqarneq taamalu kalaallit nunaanni nunap nunatavianiittunik aatsitassanut ikummatissanullu oqartussaannermut iluaqutiginninnissanannermullu piginnittussaaneq Kalaallit Nunaata tiguaa. Taamaasilluni Kalaallit Nunaanni innuttaasut piginnaatitaaffii qulakkeerneqarsimapput aatsitassanut ikummatissanullu inatsisikkut aamma aatsitassanut ikummatissanullu inatsit naapertorlugu Naalakkersuisut inuttaasut tamarmiusut sinnerlugit oqartussaassuseqarnerisigut.

Aatsitassanut ikummatissanullu inatsimmi § 1 imm. 2-mi allanneqarsimavoq ingerlatanik suliarinninnermi isumannaallisaaneq, peqqissuseq, avatangiisit, pisuussutininik atorluaaneq kiisalu inuiaqatigiinnut akornutaanngitsumik ingerlatat suliarineqarnissaat

kiisalu pissutsini assigiinngitsuni nunat tamat pitsaasumik ileqqorissaartarnerat naapertorlugit akuerisaasut qulakkeerneqarnissaat anguniarneqartoq.

Taamaasillugit Naalakkersuisut nakkutigissavaat mianerisassat tamakku tamarmik malinneqarsimanissaat aatsitassanik ikummatissanillu misissueqqissaarnernut iluaqutiginninnernullu kisermaassilluni akuersissutinik ilusilersuinermi aamma nalunaarutiginninnerni. Taamaasilluni kisermaassilluni akuersissutini aamma ILO isumaqatigiisummi nr. 169-imi naapertuutinnngitsaqanngilaq.

Inussiarnersumik inuulluaqqusillunga
Inuussutissarsiornermut Aatsitassanut Ikummatissanullu Naalakkersuisoq



Ove Karl Berthelsen